



Wie die Nibelunge ze Ezelen  
bryge chomen.

XXVIII. Auenture.

**D**o die Nibelunge. chomen indaz lant.  
do vrieschez von Berne. meister Hildebrant.  
er sagtez sine herren. ez was im grimme leit.  
er bat in wol enpfahen. die chonen ritter gemeit.

Do hiez der starche Wolfhart. bringen in die march.  
do reit mit Dietriche. vil manic reche starch.  
da si se enpfahen wolden. zo zin an das velt.  
da hetens vf gebunden. vil manic herlich gezelt.

Do si von Tronege Hagene. verrest chomen sach.  
zo den sinen herren. der helt vil balde sprach.  
nu solt ir snellen degene. von dem sedele stan.  
vnt get in hin beegene. die ivch hie wellent enpfan.

Dort chvmt her ein gefinde. das ist mir wol bechant.  
es sint vil snelle degene. von Amelunge lant.  
die foret der von Berne. si sint vil hochgemvot.  
ir sulz in wol erbieten. das rat ich sprach der degen gvot.

Do stonden von den rossen. das was vil michel reht.  
nider mit Dietriche. manic ritter vnt knecht.  
si giengen zo den gesten. da man die helede vant.  
si gvozten minnekliche. die von Goregonden lant.

Do si der herre Dietrich. zo zim chomen sach.  
beide liebe vnde leide. im dar an geschach.  
er weste wol die mare. ir reise was im leit.  
er wande es weste Rodeger. das erz het in geseit.

Sit willechomen her Gunther. Gernot vnt Giselher.  
Hagen vnt Dancwart. sam si oech Volker.  
vnt allez iwr gedigene. den Sivrides tot.  
weinet min frow Chriemhilt. noch diche in angefllicher not.

Si mac vil geweinen. sprach do Hagene.  
er lit vor manigem iare. zetode erslagene.  
den kunech von den Hunen. den si genomen hat.  
den sol si nu minnen. Sivrit so gahes niht erstat.

Tot des chunen rechen, lazen wir nu sten.  
sol lebn min frow Chriemhilt. noch mac schade ergen.  
so redete von Berne. der herre Dieterich.  
trost der Nibelunge. da vor behvet du dich.

Wie sol ich mich behuten. sprach der kunic her.  
Ezel vns boten sande. wof sol ich vragan mer.  
daz wir zu zim chomen. her in siniv lant.  
ovch hat vns vnser swester. aller triwen gemant.

So wil ich in wol raten. sprach do Hagene.  
nu bitet in diu märe. baz ze sagene.  
den herren Dietrichen. vnt sine helde goot.  
daz si inoch lazen wizen. der frowen Chriemhilde mvot.

Do giengen sunder sprachen. di dri kunige rich.  
Gunther unde Gernot. vnt ovch her Dietrich.  
nu sage vns von Berne. vil edel ritter goot.  
wie dir si gewizzen. der frowen Chriemhilde mvot.

Do sprach der vogt von Berne. was sol ich in mere sagen.  
wan alle morgen frveie. weinen unt klagen.  
höre ich vil iämerliche. daz Ezeln wip.  
dem richen got von himele. des starchen Sivrides lip.

Ez ist et vnerwendet. sprach do der spileman.  
Volker der vil chvne. daz wir vernomen han.  
wir soln zehove riten. vnt soln daz besehn.  
was vns snellen degenen. mvge zen Honen geschehn.

Die chunin Burgonden. hinze hove riten.  
si chomen herrenliche. nach ir landes siten.  
do wundert da zen Honin. vil manigen chunen man.  
vmbe Hagenen von Tronege. wie der wäre getan.

Dorch das man saget märe. des was im genvœ.  
das er von Niderlanden. Sivriden slooc.  
sterchist aller rechen. den Chriemhilde man.  
des wart michel vragen. zehove nach Hagenen getan.

Der helt was wol gewahsen. das ist al war.  
groz was er zen brosten. gemischet was sin har.  
mit einer grisen varwe. die bein im warn lanc.  
ont enstlich sin gesihene. er het herlichen ganc.


Do hiez man herbergen. vil manigen chvnen man.  
das gesinde von dem Rine. wart gesondert dan.  
das riet die kuniginne. die in argen willen trooch.  
da von man sit die knechte. an der herberge slooch.

Danewart Hagenen broder. der was marschalch.  
der kunec im sin gesinde. vil vliżeklich bevalch.  
das er ir vollechliche. mit spise solde pflegen.  
das tet do willechliche. mit triwen der vil chvne degen.

Chriemhilt die kuniginne. mit ir gesinde gie.  
da si die Nibelunge. in valschem mote enpfie.  
si chvste Giselher. ont nam in bi der hant.  
do das gesach Hagene. den helm er vaster gebant.

Nach svs getanem grooze. sprach do Hagene.  
mogen sich bedenchen. wol sielle degene.  
man grozet sunderlingen. die forsten unt ir man.  
wir han niht goter reise. zo dirre hochgerite getan.

Nu sit sprach si willechomen. swer iewch gerne siht.  
dorch iewer selbes frivntschafft. engroz; ich iewch niht.  
nu sagt was ir mir bringet. von Wormez ober Rin.  
dar vmbe ir mir so groze. soldet willechomen sin.



Het ich gewist diu märe. sprach do Hagene.  
daz iu gabe bringen. solden degene.  
ich wäre wol so riche. het ich mihs baz verdaht.  
daz ich iu mine gabe. her zen Hünen hete braht.

No solt ir mich der märe. mere wizen lan.  
hort der Nibelunge. wa habt ir den getan.  
der was idoch min eigen. daz ist iu wol bechant.  
den solt ir mir gesveret han. her in Ezelen lant.

Entriwen min frow Chriemhilt. des ist vil manic tac.  
deich hort der Nibelunge. niene gepflach.  
den hiezen mine herren. senchen inden Rin.  
da muoz er wälliche. vnz an daz iongeste sin.

Do sprach diu kuneginne. ich hans ovch e' gedaht.  
mir ist sin harte chleine. noch her zelande braht.  
swer min eigen wäre. vnt ich sin wilen pflac.  
nach im vnt sine herren. han ich vil manigen leiden tac.

Daz ist verlorn arebeit. sprach aber Hagene.  
wie mohhte ich iu iht bringen. ich han vil zetragene.  
an halssperge vnt an schilte. an mine helme lieht.  
dis swert an miner hende. des enbringe ich iu nicht.

Jane rede ihz niht darvmb. deich mere goldes welle gern.  
ich hans so vil zegebene. deich iwer gabe mac enbern.  
ein mort vnt zwene rovb. die mir sint genomen.  
des mohhte ich vil arme. noch zelibem gelte chomen.

Diu frowe hiez do chunden. den rechen vberal.  
daz niemen tragen solde. dehein wafen inden sal.  
ir helde ir solt mirs vf geben. ich sol si behalten lan.  
entriwen sprach do Hagene. daz wirdet nimmer getan.

Jane ger ich niht der eren. forsten wine mit.  
daz ir zen herbergen. troget minen schilt.  
vnt ander min gewäfen. ir sit ein kunigin.  
daz enlerte mich vater niht. ich wil selbe kameräre sin.

Owe mir der leide. sprach do Chriemhilt.  
war umbe wil min broder. vnt Hagen sinen schilt.  
von in niht tragen laz. si sint gewarnot.  
vnt wesse ich wer iz tate. ich riet im immer sinen tot.


Des antwort in zorne. der herre Dietrich.  
ich bins der hat gewarnet. die edeln forsten rich.  
vnt Hagenen den starchen. den Burgonden man.  
nu zo valandinne. do solt mihs niht geniesen lan.

Des schamte sich vil sere. daz Ezelen wip.  
si vorhte bitterliche. den Dietriches lip.  
do gie si von in dannen. daz si niht mere entsprach.  
wan daz si swinde bliche. an ir viande sach.

Bihenden sich do viengen. zwene degene.  
daz eine was her Dietrich. daz ander Hagene.  
do sprach gezogenliche. der reche vil gemeit.  
daz iwer chomen zen honen. daz ist mir grozelichen leit.

Do stonden bi ein ander. die rechen lobelich.  
Hagene von Tronege. vnt ouch her Dietrich.  
ingrozen zohnten manigen. die ritter wolgetan.  
daz sach der kuncz Ezele. dar umbe er vragen do began.

Die märe ich wiste gerne. sprach der kunic rich.  
wer iener reche wäre. den dort her Dietrich.  
so friontlich enpfahet. er treit vil hohen mvot.  
swer sin vater wäre. er mach wol sin ein helt gvot.



Des antwertem kunige. ein Chriemhilde man.  
er ist geborn von Tronege. sin vater hiez Adrian.  
swie blider hie gebarte. er ist ein grimmer man.  
ich laze ouch das wol schowen. das ich gelogen niene han.

Wie sol ich das erchennen. das er so grimmech ist.  
noch dann er niht enwiste. vil manigen argen list.  
den div koniginne. an ir freunden begie.  
das si ir mit dem lebene. niht einen dannen chomen lie.

Wol erchande ich Adrianen. der was min man.  
lob vnt michel ere. er hie bi mir gewan.  
ich machet in zerritter. vnt gab im min golt.  
Heleche div getriwe. was im inneklichen holt.

Da von ich wol erchenne. alles Hagenen sint.  
ez wrden mine gisel. zwei wätlichiv kint.  
er vnt von Spane Walther. die wohsen hie zeman.  
Hagenen sande ich widere. Walther mit Hilttegunde entran.

Er gedahte langer mäere. div warn e' geschehn.  
sinen frivnt von Tronege. den het er recht erschn.  
der im in siner iugende. vil starchen dieneft bot.  
sit frivnter im in alter. vil manigen frivnt tot.

